



## NEZNANJE CARUJE, glupost klade valja

**N**e znam kako vi, dragi moji, ali ja ovih dana zaista pomno razmišljam o nama samima... Razloga ima više nego što ih želim i serviraju mi se skoro na dnevnoj bazi. Pratim ove plenumaše i naibretit' se ne mogu ljudskoj gluposti, a dodatno me rastužuje i to što mi se čini, da parafraziram onu prvu evrovizijsku, Fazlinu – *Sva GLUPOST svijeta je noćas u Bosni...* Ni Hercegovina nije izuzeta, da se razumijemo. I nije sad da sam šokirana što neki od sagovornika ovih brojnih novinarskih 'veličina' koji ih zaskaču za izjave (pri tome ih, mislim te izjave, tretiraju kao da su upravo čuli neku drevnu mudrost koja je vijekovima bila nedostupna običnim smrtnicima) uglavnom nemaju pojma o čemu govore; lično mislim da čak ne znaju ni šta žele; a posebno ne znaju kako doći do onoga što kao žele. I tu postanem svjesna koliko malo kao građani znamo o funkcioniranju države, entiteta, kantona i općina. Što je daleko od svake slučajnosti.

I baš se pitam hoćemo li ikada biti u stanju sagledati sebe onakvima kakvi jesmo, hoće li iko imati snage otvoreno reći da ni kao narodi, a ni kao građani, nismo baš toliko pametni koliko samozodovoljno volimo misliti o sebi. Hoće li se ikada reći da nam nedostaje znanja u skoro svim oblastima; da se ponašamo bahato i umišljeno na općem planu, a ni u specijaliziranim znanjima nismo ništa bolji. Ne mislim, dakako, na pojedince kojih ima, a koji posjeduju i znanje i vještine, jer oni su nažalost samo izuzeci koji potvrđuju pravilo koje za ovaj geografski prostor glasi – da što manje radim, za što više para i da me niko ne pita za konkretne rezultate.

Samo kad uzmete lažne dileme koje se prave u javnosti, a sve samo da bi se sačuvao taj privid u kojem se ovdje živi da smo lijepi, pametni, vrijedni... Ako, recimo, želite uložiti novac u energiju, i to čistu energiju – cijeli svijet se zadržava oko jeftine i čiste energije – pa imate namjeru podići vjetroпарк, slobodno se nadajte da će se naći neki od obližnjih stanovnika koji će se očas organizirati u neku 'revolucionarnu' grupu koja će kategorično biti protiv vjetrenjača, jer njihov šum "plaši stoku"!!! Pri tome misle na one tri ovce koje imaju sva sela zajedno... Ili će biti protiv fabrike koja, doduše, zapošljava pola stanovnika grada i gravitirajućih sela, ali iz koje dopire neki čudan miris... Ne, oni imaju pametan prijedlog – neka *Država* omogući da je struja besplatna, pa problema sa tamo nekim jeftinijim energijama neće ni biti, a kad je u pitanju onih nekoliko fabrika koje rade, neka brate idu s milim Bogom tamo negdje... E, a da bi disali miomirisanim zrakom, a istovremeno da ne bi imali nezaposlenih, neka lijepo te plaće šalju poštom... I zrak čist i (one tri) ovce na broju... A i nema tih... nezaposlenih... Ostalo im je još samo da nađu državu koja može izdržati maštarije Bosanaca i Hercegovaca.

P.S. Nedavno sam se vozila kroz jednu zapadnu zemlju, veoma je lijepa i svjetski brendirana kao destinacija snova koju morate vidjeti prije nego odete sa ovoga svijeta. I zaista je neponovljiva, osim što se dobrih sat i po vozite kroz neki neprijatan miris koji se zavukao u svaku poru vazduha koja vam stoji na raspolaganju. Pitah i saznadoh da je u blizini fabrika celuloze, a i sam kraj je poznat po uzgoju svinja, pa je miris prirodan i očekivan. I niko se ne buni, ne blokira saobraćajnice, a ni lokalne općinare ne gađaju pokvarenim jajima. Ljudi prosto žive od toga i poštuju čak i posljedice onoga što im donosi kruh svagdašnji... Zemlja se, inače, zove Italija... **B**

Aida Delić,  
glavna i odgovorna urednica